


Greg Linteris, l'astronauta furlan che al puartà la bandiere dal Friûl tal spazi

Ai 4 di Avrîl dal 1997 (juste dopo dai 3 di Avrîl, zornade une vore cjare ai furlans che in chê di a ricuardin la costituzion dal Stât patriarcjâl furlan, tal 1077) il prin astronaute di divignince furlane te storie al partì par une mission spaziâl sul Space Shuttle Columbia, puartant daûr la bandiere dal Friûl. Propit a lui, ven a stâi Gregory Thomas Linteris, la youtuber Desiree Chiappo e à dedicât un gnûf video di YouPalTubo: il canâl YouTube cun passe 12.500 iscrits promovût de ARLeF - Agenzie regionâl pe lenghe furlane, là che i protagoniscj a son une clape di zovins furlans impegnâts a contâ lis lôr passions, metint adun videos su curiositâts dal Friûl.

La clip *La bandiere furlane tal spazi* e je stade presentade in maniere uficiâl vie pes celebrazions de 47e edizion de Fieste de Patrie dal Friûl a Tarcint. L'astronauta Linteris, che vuê al è inzegnîr mechanic al NITS - National Institute of Standards and Technology (Istitût nazionâl pai standard e la tecnologie dai Stâts Unîts) al è intervignût aes celebrazions cuntun videomessaç.

Greg al è nassût tal New Jersey di doi emigrâts furlans: Luigi Linteris, di San Zuan di Cjasarse, e Elena Maria

Alfenore, di Prodolon di San Vît dal Tiliment. Propit dai gjenitôrs, soredu dal pari, Greg al à ereditât il leam cu la sô tiere di divignince. La sô e je une storie fate di sucès: une laurea a Princeton, un master a Stanford, un dottorât in inzegnarie mecaniche e aerospaziâl, e plui tart il spazi. Dopo cetantis selezions e un adestrament grivi, Linteris al è partît pe sô prime mission scientifiche sul Shuttle, la STS-83, puartant indenant esperiments peâts al fenomen de combustion in microgravitât, ae mecaniche dai fluits e ae sience dai materiài. Propit par cheste ocasion si è puartât daûr la bandiere dal Friûl: ogni astronaute di fat al pues sielzi cualchi ogjet personâl di vê cun se intant des missions. Gregory, in maniere significative, al à volût la bandiere dal Friûl, par ricuardâi la sô tiere e i valôrs di comunitât che i son stâts trasmetûts.



Gregory Thomas Linteris

La bandiere cu la acule eraldiche che lu à acompagnât tal Shuttle i jere stade consegnade di une cubie di parinçj dal pari, emigrâts in Canada e une vore atîfs inte Famee Furlane di Toronto: Sara Alfenore e il so om, Mario Fava. Dopo che al è tornât su la Tiere, la Famee Furlane i à fat fieste inte capitâl dal Ontario, propit cuntune cerimonie speciâl.






76^a

SAGRA

del VINO

dal 24 aprile
al 6 maggio 2024

CASARSA della DELIZIA

www.procasarsa.org









